

乾隆歷城縣志

歷城縣志卷第四十九

雜綴一

軼事

漢志小說家者流蓋出於稗官如淳曰細米為稗街談
巷說細碎之言也今一縣之事或鉅或細皆麗於各門
矣間有文無所附或語近弔詭而傳自古遠不可盡廢
者復遴擇之為雜綴曰軼事曰異聞雖不能蒐羅大備
或亦可為道聽塗說者之資云爾

周

大東之詩二章曰小東大東杼柚其空糾糾葛屨可以

履霜佻佻公子行彼周行既往既來使我心疚毛傳云
空盡也佻佻獨行貌公子譚公子也鄭箋云小也大也
謂賦斂之多少也小亦於東大亦於東言其政偏失砥
矢之道也譚無他貨惟絲麻耳今盡杼袖不作也葛屨
夏屨也周行周之列位也言時財貨盡雖公子衣屨不
能順時乃夏之葛屨今以履霜送轉餽因見使行周之
列位者而發幣焉言雖困乏猶不得止既盡疾病也言
譚人自虛竭餽送而往周人則空盡受之曾無反幣復
禮之意是使我心傷病也

據毛詩
註疏

衛風碩人之詩首章曰邢侯之姨譚公維私毛傳云妻

之姊妹曰姨姊妹之夫曰私孔正義云釋親云妻之姊妹同出為姨女子謂姊妹之夫為私孫炎曰同出俱已嫁也私無正親之言然則謂吾姨者我謂之私邢侯譚公皆莊姜姊妹之夫互言之耳春秋譚子奔莒則譚子爵言公者蓋依臣子之稱便之耳

同上

漢

濟南睢氏宗人三百餘家豪猾二千石莫能制於是景帝拜郅都為濟南守至則誅睢氏首惡餘皆股栗居歲餘郡中不拾遺

漢書

豹文彪鼠鼠文彩如豹者漢武帝時得此鼠孝廉郎終

軍知之賜絹百匹

爾雅注

哀帝時鮑宣坐距閉使者亡人臣禮大不敬不道下廷尉獄博士弟子濟南王咸舉幡太學下曰欲救鮑司隸者會此下諸生會者千餘人朝日遮丞相孔光自言丞相車不得行又守闕上書上遂抵宣罪減死一等髡鉗

漢書

平陵東翟義門人所作也王莽殺義義門人作歌以怨

之

在約古
今注

樂府解題曰義丞相方進之少子字文仲為東郡太守以王莽方篡漢舉兵誅之不克見害門人作歌以怨之

也平陵東松栢桐不知何人刳義公刳義公在高堂下

交錢百萬兩走馬兩走馬亦誠難顧見追吏心中惻心

中惻血出漉歸告我家賣黃犢

郭茂倩樂府詩集

碑陰題名二皆不知為何碑陰其人各記所出錢數時

有門生濟南東郡等字而姓名無復完者

隸釋

舉吏張元殘題名碑 門生濟南郡平關文 千門生

濟南梁郡虞升仲 二千

洪适隸續

右舉吏汝南張元殘題名其可見者門生濟南二人

按濟南郡平當是平陵又曰濟南梁郡郡字必鄒

字之訛

劉寬碑陰門生名列口長濟南東平陵孟豐定高四百
百 臺長彭城武原周暹升舉五百

王純碑陰諸門生名 濟南郭季卓濟南高建祖

濟南高與興濟南孫和仲濟南關顯豪濟南關秀 濟

南關元關

以上俱
隸續

魏

魏劉熹學生冢碑并陰隸書文字磨滅不完其間有稱

大魏大者襄州圖經曰熹常為穀城令此碑在穀城縣

學生冢旁

集古
錄目

魏學生塚碑在今襄州之穀城按鮑至南雍州記穀城

設伯綏之國其東北有學生冢冢有碑乾道初元春三月余督餼穀城撫得此墨本凡授尚書者二人授禮記者七人授孝經儀禮者各一人授左傳者六人授易者四人授詩者十七人各書州里姓氏字之而不名祭酒一人故吏二人生三十有八人童八人書姓字書名而不書里邑孔子作春秋視人之賢否為褒貶或以名或以字或書爵邑或不書豈亦春秋之法乎

集古後錄

南燕

虎窟山相傳燕建平中濟南太守胡諮於此山窟得白

虎因名焉

酉陽雜俎

劉宋

糧塚城東梁家莊世傳檀道濟軍至歷城乏食乃唱籌量沙而以餘米覆其上今數塚尚存

舊志

元魏

高遵為齊州刺史其妻明氏家在齊州母弟舅甥共相憑屬爭求貨利嚴暴非理齊州人孟僧振至洛訟遵詔廷尉少卿劉述窮鞠皆如所訴遂賜遵死

魏書酷吏傳

唐

陳子昂送著作佐郎崔融等從梁王東征序歲七月軍出國門時比部郎中唐奉一考功員外郎李迥秀著作

佐郎崔融並參帷幕之賓掌書記之任

見文苑英華

崔融瓦松賦序曰崇文館瓦松者產於屋簷之下謂之木也訪山客而未詳謂之草也驗農皇而罕記賦云煌煌特秀狀金芝之產雷歷歷虛懸若星榆之種天葩條郁毓根柢連卷間紫苔而裊露凌碧瓦而含烟又曰慚魏宮之烏悲惡漢殿之紅蓮崔公學博無不該悉豈不知瓦松已有著說乎

酉陽雜俎

久視元年改控鶴府為奉宸府張易之為奉宸令引詞人為供奉佞者奏云昌宗王子晉後身今被羽衣吹簫乘木鶴奏樂於庭融賦詩為絕唱有昔遇浮邱伯今同

丁令威中郎才貌是藏史姓名非之句後與宰相蘇味道相請云某詩所以不及相公無銀花合也蘇有詩云火樹銀花合味道云子詩雖無銀花合還有金銅丁取令威之句也

唐書紀事

濮州長史蕭府君碑

員半千撰次子令臣正書大足元年四月金石錄

員半千隴右途中遭非語詩云趙有兩毛遂魯聞二曾

參慈母猶且感況在行路心冠冕無醜士賄賂成知己

名利我所無清濁誰見理弊服空廷春緩帶不着身出

遊非懷璧何憂乎忌人正須自保愛振衣出世塵

唐詩紀事

薛彥輔母林氏送男左貶詩云他日初投杼勤王在隱

兵有辭期不罰積意許相仍謫宦今何在銜冤猶未勝
天涯分越徼驟騎速毗陵腸斷腹非苦書傳寫豈能淚
添江水遠心劇海雲蒸明月珠難識甘泉賦可稱但將
忠報主何懼點青蠅

何澤韶陽曲江人也父鼎容管經畧有文稱澤乾寧中
隨計至三峯行在永樂崔公安潛即澤之同年友人也
聞澤來乃以一絕報之曰四十九年前及第同年惟有
老夫存今日殷勤訪吾子穩將鬢鬣上龍門時主文與
奪未分又會相庭有所阻

時崔相公允恃權
即永樂猶子也

因之敗于

垂成後漂泊關外梁太祖受禪澤假廣南幕職入貢勅

賜及第

世謂崔魏公鉉好食新餼頭杜斷公惛每早食饋飯乾脯崔侍中安潛看闕牛李衛公曰吾喜見未聞新書策

以上俱唐詩紀事

崔侍中安潛崇奉釋氏鮮茹葷血唯於刑辟常自躬親雖僧人犯罪未嘗屈法於聽事前慮囚必溫顏恤惻以盡其情有大辟者俾先示以判語賜以酒食而付於法鎮西川三年唯多蔬食宴諸司以麪及薊蒻之類染作顏色用象豚肩羊膾膾炙之屬皆逼真也時人比於梁武而頻於使宅堂前弄傀儡子軍人百姓穿宅觀看一

無禁止而中壺預政以玷盛德惜哉

孫光憲北夢瑣言

崔安潛東洛掌選人有不能顯其姓名竊顧雲故事投

獻者崔公不之知大賞嘆召之與語便注一超資縣令

後有人白之崔公方悔

太平廣記

崔昭矩大順中裴贄下狀元及第翌日兄昭緯登庸

同上

唐楊德幹為齊州刺史有威嚴時語曰寧食三斗炭不

逢楊德幹

見舊唐志

釋義淨在西國因巡禮見希公住房傷其不幸聊題一

絕百苦亡勞獨進影四恩在念契流通如何未盡傳燈

志溘然於此遇途窮

大唐西域求法高僧傳

宋

天聖寶元間范諷與石曼卿皆喜曠達酣飲自肆不復
守禮法謂之山東逸黨一時多慕效之龐穎公為開封
府判官獨奏諷以為苟不懲治則敗亂風俗將如西晉
之季時諷嘗歷御史中丞為龍圖閣學士穎公言之不
已遂詔置獄劾之諷坐貶鄂州行軍司馬曼卿時為館
閣校勘亦落職通判海州仍下詔戒勵士大夫於是其
風遂革

葉夢得石
林燕語

予過濟南龍山鎮監稅宋寶國出王氏華嚴經解相示
曰公之於道可謂至矣予問寶國華嚴有八十卷今獨

以解其一何也寶國曰王氏謂我此佛語深妙其餘皆
菩薩語耳予曰予於藏經取佛語數句置菩薩語中復
取菩薩語置佛語中予能識其是非乎曰不能也非獨
予不能王氏亦不能予昔在岐下聞汧陽猪肉至美遣
人置之使者醉猪夜逸置他猪以償吾不知也而與客
皆大詫以為非他產所及已而事敗客皆大慚今王氏
之猪未敗爾昔者買肉娼女歌或因以悟若一念清淨
墻壁瓦礫皆說無上法而云佛語深妙菩薩不及豈非
夢中語乎寶國曰唯唯

蘇軾東坡外集

昔有以詩投東坡者朗誦之而請曰此詩有分數否坡

曰十分其人大喜坡徐曰三分詩七分讀耳此雖一時
戲語然涪翁所謂南窗讀書吾伊聲蓋讀書者其聲正
自可聽耳王沔字楚望端拱初參大政上每試舉人多
令沔讀試卷沔素善讀縱文格下者能抑揚高下迎其
辭而讀之聽者忘厭凡經讀者每在高選舉子凡納卷
者必祝之曰得王楚望讀之幸也若然則善於讀者不
為無助焉

周書卷之
離賦新集

曾子固熙寧間守齊州作北渚亭蓋取杜陵宴歷下亭
詩東藩駐皂蓋北渚凌清河之句至元祐間晁無咎補
之繼來為守則亭已頽毀久矣補之因重作亭且為之

記記成疑其步驟開闔類子固擬岷臺記於是易為賦
且自序云或請為記答曰賦可也蓋寓述作之初意云
然所叙晉齊攻戰三周華不注之事雖極雄贍而或者
乃謂與坡翁赤壁所賦孟德周郎之事畧同補之豈路
襲者哉大抵文欲自出機杼者極難而古賦為尤難惟
陳言之務去戛戛乎其難哉雖昌黎亦以為然也

癸辛
雜識

外集

東北冬月寒甚夜氣塞空如霧著於林木凝結如珠玉
旦起視之正薄雪也見曉乃消釋因風飄落齊魯人謂
之霧淞諺云霧淞重霧淞窮漢置飯甕蓋歲穰之兆也

曾子固之齊州有冬夜詩云香清一榻氍毹暖月淡千
門霽淞寒又有霽淞詩云園林初日靜無風霽淞開花
處處同記得集英深殿裏舞人齊插玉籠鬆蓋謂是也
東坡在定武送曹仲錫詩亦云斷蓬飛葉落黃沙祇有
千林鬢鬆花應謂王孫朝上國珠幢玉節與排衙亦謂

此也霽淞

音夢送

鬢鬆皆同音

墨莊漫錄

曾子固以熙寧五年守濟南其後二十一年晁無咎繼
來為守作北渚亭賦最著有別歷下二絕句云來見芙
蕖滿渚香歸途未變柳梢黃殷勤釣突溪中水相送扁
舟向汶陽鴛鴦灘鴻繞漁梁搖漾山光與水光不管使

君征棹遠依然飛下舊池塘又將行陪貳車觀燈云行
歌紅粉滿城歡猶作常時五馬看忽憶使君身是客一
時揮淚逐金鞍又赴齊州詩云淮南蒙召鬚毛斑乞得
東秦慰病顏曉整輕鞍汶陽北却衝微雨看青山吾州
於宋得子固子由無咎三公而東坡公過此亦有濟南
春好雪初晴行到龍山馬足輕之咏足敵唐北海子美
太白三公矣

居易錄

按東坡濟南春好雪初晴詩陽關曲之一也已見
山水考今考公集復得其至濟南李公擇以詩相
迎次其韻詩二首敝裘羸馬古河濱野濶天低糝

王塵自笑餐糧典蜀國來看換酒謫仙人
宦游到處身如寄農事何時手自親
刺作新詩與君和莫因風雨廢鳴晨
夜擁笙歌雪水濱回頭樂事總成塵
今年送汝作太守到處逢君是主人
聚散細思都是夢身名漸覺兩非親
相從繼燭何須問蝙蝠飛時日正晨

李公擇亦為齊守而歷下詩不多見
惟穎濱集有和公擇赴歷下道中雜詠
十二首耳公擇子由在齊正同時

也香祖筆記

按李公擇黃山谷舅也山谷伯氏在濟南詩及鵲

山亭橋亭諸詩已見古蹟考今考山谷集又得數
詩并錄於後用明發不寐有懷二人為韻寄李象
彝德叟詩云人生不如意十事恒八九未見歷下
人徒傾壓城酒從來親骨肉不免相可不但願崇
事實虛名等箕斗桃李春成徑本自不期人歷下
而寒士簞瓢能悅親恥蒙伐國問肯卧覆車塵子
既得此友從之求日新又寄李師載詩云齊地穀
翔貴排門無嬰饋二仲有甘旨奉親亦良勤原田
水洗洗何時稼如雲無民願豐歲政自不忘君又
寄李子先詩云客從濟南來遺我故人書墨淡字

疎行故人情有餘上言猶健否次問意何如只今
意何有思食故溪魚

又按子由和公擇赴歷下道中雜詠十二首多無
與於歷城今考藥城集凡在歷城詩俱附於後喜
雪呈李公擇云秋來早已久雪至亦不薄沉沉夜
未眠兢兢聲初落霏微入疎戶眩晃先朱閣披衣
視羣動照屋始驚愕晨起犯清寒繁陰看溟漠喬
林凍相倚隙瓦乾猶燥孤村掩圭竇深徑沒芒屨
平野恣汗漫四山增莽埔晚色漏斜陽林光繁相
鉅氛埃一清揚疫癘解纏縛寒蔬養春芽宿麥布

冬卿官居亦何賴歲事信所託遁逃幸一飽剽盜
止羣惡無事樂自多有酒底可酌我行今不久公
到時方昨豐稷識天意暇豫可前約齋厨雖無餘
賓客甚易諾行須酒壺倒莫待陰雲剥又次韻范
郎中仰之詠雪云倉粟未應空長天霰雪濛瓊瑤
布地淨組練出師雄雲閣諸峯遍花繁百草同農
謠麥壠外客興酒杯中聚散占風力消融驗藥功
歷城西北陽起石
山其上的不留雪遠遊聊自喜三見歲時豐又寄
濟南守李公擇云岱陰皆平田濟南附山麓山窮
水泉見發越遍溪谷分流繞塗巷暖氣蒸草木下

田滿粳稻秋成比禾菽池塘浸餘潤菱芡亦云足
辭家四千里特此慰窮獨公從吳興來蒼雪猶在
目應恐齊魯間長被塵土辱不知西垣下泥濘千
畝渌仰見鷗鷺翻俯視龜魚浴初來厭桴鼓稍久
捐鞭朴清詩調嘉賓夜話繼華燭飛花暮雪深浮
蟻糟牀熟相對各忘歸西來自嫌速人生每多故
樂事難再卜鉅野一汗漫河濟相騰蹙流沙翳桑
土蛟蜃處人屋農畝分沉埋城門遭板築傷心念
漂蕩引手救顛覆勞苦空自知吁嗟欲誰告遙知
舊遊處落落空遺躅平生讀書史物理粗能燭歸

耕久不遂終作羖羊觸賦詩心自驚請公再三讀
又送施歷城辭歸常州詩云高人不愛塵土侵三
年浙江臧何深久閑物理有相復歷城官事森成
林乘時斂散逐十二鞭撻逋負徒哀矜一杯相屬
未嘗得百畝歸去將安能潛逃雖出知者後黽勉
尚見仁人心歸期忽告三月尾強留不顧千黃金
河豚雖過鱸鰕在粳稻正插風雨淫酒有勞苦登
隣里期會迫隘思僚朋山川吳越我所愛扁舟佗
日要追尋滯留未用便相耗半年歲月行駸駸又
施君既去復以事還戲贈詩云令尹西行去又迴

西湖重把舊樽罍吏民再見雞棲乘猶道吾公晚
不來又答文與可以六言詩相示因道濟南事作
十首遠遊既為東魯遷居又愛南山齒髮自知將
老心懷且欲偷安舜井溢流陌上歷山近在城頭
羈旅三年忘去故園何日歸休野步西湖綠縹緲
登北渚烟絲蒲蓮自可供腹魚蠅何嘗要錢飲酒
方橋夜月釣魚盡舫秋風冉冉荷香不斷悠悠水
面無窮雨過山光欲溜寒來水氣如蒸勝處何須
吳越隨方亦有遊朋揚雄執戟雖久陶令歸田未
能眼看雲山無奈神傷薄領相仍終歲常親鞭朴

此生知負詩書欲尋雅學無處時有故人起予故
人遠在江漢萬里時寄聲音聞道禪心寂寞未廢
詩人苦吟佳句近參風雅微辭間發離騷竊欲比
君庾信莫年詩賦尤高相思欲見無路滿秩西歸
有時及君鈴閣少事飲我松醪滿卮

祖無擇歷城春日對酒詩百尺游絲拂面來數枝紅杏
向人開眼前信美非吾土且勸春風酒一杯

集

歌者李蘇蘇詩歌妙累累若貫珠歷城雅祇數蘇蘇何

當更唱陽春曲為爾今宵倒玉壺

同上

晁无咎有竹堂記濟南李文叔為太學正得屋於經衢

之西輪直於官而居之治其南軒地植竹砌旁而名其
堂曰有竹勝諸棟間又為之記於壁率午歸自太學則
坐堂中埽地置筆硯呻吟策牘為文章日數十篇不休
如繭抽緒如山雲蒸如泉出地流如春至草木發須臾
盈卷軸門窗几案婢僕犬馬目前之物有一可指無不
論說形容彊誦而故評之以致其欣悅而於竹尤數數
也顧其地狹而卑天雨榛蕪蜘蛛之織河柳兔葵之所
交橫而蒙翳人不知其竹也有過者文叔必顧堂下而
語之讀壁間記仰棟而指其勝曰吾固詔客矣客默然
而笑曰今夫渭川之千畝淇園之林與南山之造天而

蔽日者其大若杯若盂若桐梓之軀其膠繚岫岩之上而臨百仞之淵不特出屋檐而摩牆堵也莫春者春雷隱山萬竒奮角如犀兕作籜解而出碧一日百尺彌望不可以極於時刀斧之取材者度徑圍而得之大小齊一西轉巴笮南引江漢浮渭而亂河圉東種蜀而下者為筒為竿為屋椽捷萬千丈之竿徧國之藩籬是賴與竅而比夫律呂以悲哀娛耳者簪聲滿天地也是其旁之入室廬竹也用器竹也樵而薪者竹也以貿米鹽而出之其鄰境者竹也夫此人豈知竹之愛脩然而喜諄諄然語人而以夸之曰吾居有竹也哉文叔亦職然而

笑曰不然夫物安知其貴賤之所常在玉之美而藍田以抵鵠沈為美木而交趾以為槃食菰白鷗錦雉山中以醢腊而貴人以百金致茗以為粥而胡人以為佩夫物固有以多為賤而以少為貴者今夫王城之廣大九塗四達三門二百坊之基置上自王侯至於百姓庶民宮接而垣比車馬之所騰藉人氣之所蒸漬驚塵百里欲求尺寸之地以休佚而莫之致而貧者置園無所況於其他哉然則環堵不容丈而有竹如吾堂者不知能幾人也則余所以揭之於棟而名之書諸壁而記之脩然而喜諄諄然語客而以夸之不亦可哉且竹之美

昔人以比德松栢在冬夏青青君子之所獨也以夫少
猶貴之使余得見夫渭川淇園與南山之蒼蔚者而遊
其間雖多固不可賤也夫多猶不可賤而又況其少哉
客曰唯雖然吾聞昔王子猷好竹嘗曰安可一日無此
君聞吳中士大夫有佳竹欲觀之徑出坐與造竹下諷
嘯良久主人欲留而不可將出主人聞之因盡歡而返
今文叔居有竹文叔姑亦洒埽儲具借不邀客客將造
門坐堂上不去曰竹固招我元祐四年五月二十八日

穎川晁補之无咎記

雞肋集

禮部移竹詩次韻李負外文叔東南之美者見伐以直

幹豈如此君踈猶作此郎玩此郎乃在此無乃材亦散
平生吉甫誦意鄙枚叔亂坐狂得此冷對竹頭幘岸尚
思殺青書充字白虎觀恐此愧子猷還成倚楹歎

文叔有志

史

同上

與李文叔夜談詩中庭老栢霜雪裏北風烈烈偏激耳
誦詩夜半舌入喉飲我樽中淥醺美升堂辭翰愧非有
何異還家數其齒文章萬古猶一魚乙丙誰能辨腸尾
更慙頗似會稽康欲語常遭士瑤杞廣陵八月未足言
曾使醒釀忍然起安得譚如子枚子

同上

張耒答李文叔為兄立謚書賢兄之懿人實聞之其不

至公卿而死不得使有司顯議而公諡之其為不幸無
可言者但其德美之實苟不可泯滅自應傳世而今乃
兄弟生徒為之易名則夫薄俗之喜以嫌處物者久矣
孰肯為弟不私其兄哉既嫌於私則聞者不信不信則
并與其實而敗之矣所以愛之正所以害之也願更審

度

見傾宸
宋文選

趙明誠守淄清照積書數十萬卷金人南下清照倉皇
渡江書漸散失惟漱玉集行世王季木齊音云京朝名
跡此中稀剗水黥山感吳時惟有女郎風雅在又隨兵

舫泣江離

舊志

宋濂週李易安所書琵琶行後詩序樂天謫居江州聞
商婦琵琶技淚悲歎可謂不善處患難矣然其辭之傳
讀者猶愴然況聞其事者乎李易安固而書之其意蓋
有所寓而永嘉陳傳良題識其言則有可異者余戲作
一詩正之於禮義亦古詩人之遺音與

宋學士全集

嘉泰癸亥歲劉改之在中都時平稼軒帥越聞其名遣
介招之適以事不及行作書歸輅者因傲卒體沁園春
一詞併緘往下筆便逼正其詞曰斗酒彘肩醉渡浙江
豈不快哉被香山居士約林和靖與蘇公等駕勒吾四
坡謂西湖正如西子濃抹淡粧臨照臺諸人者都掉頭

不顧只管傳杯白云天竺去來圖畫裏崢嶸樓觀開著
縱橫一澗東西水繞兩山南北高下雲堆逋曰不然暗
香疎影只可孤山先探梅蓬萊閣訪稼軒未晚且此徘徊
辛得之大喜致餽數百千竟邀之去館燕彌月酬倡
疊疊皆似之逾喜垂別賜之千緡曰以是為求田資改
之歸竟蕩於酒不問也

岳珂
程史

辛稼軒帥浙東時晦菴南軒任倉憲使劉改之欲見辛
不納二公為之地云某日公燕至後筵便坐君可來門
者不納但喧爭之必可入既而改之如所教門外果誼
譁辛問故門者以告辛怒甚二公因言改之豪傑也善

賦詩可試納之改之至長揖公問能詩乎曰能時方進
羊腰腎羹辛命賦之改之對寒甚願乞卮酒酒罷乞韻
時飲酒手顫餘瀝流於懷因以流字為韻即吟云拔毛
已付管城子爛首曾封關內侯死後不知身外物也隨
樽酒伴風流辛大喜命共嘗此羹終席而去厚餽焉又
云稼軒守京口時大雪帥僚佐登多景樓改之敝衣曳
履而前辛令賦雪以難字為韻即吟云功名有分平吳
易貧賤無交訪戴難自此稱莫逆云

蔣正子山房隨筆

朱子答辛幼安啟光奉宸綸起持憲節昔愚民犯法既
申震驚之威今聖上選賢更作全安之計先聲攸暨慶

譽交興伏惟某官卓犖奇材疏通遠識經綸事業有眇
肱王室之心游戲文章亦膾炙士林之口輶車每出必
著能名制閫一臨便收顯績茲久正庭之逸爰深正宁
之思當季康患盜之時豈張敞處閒之日果致眷渥特
畀重權歌皇華之詩既諭示君臣之好稱直指之使想
潛消郡國之姦第恐賜環不容暖席

朱子大全文集

問陳亮可用否曰朝廷賞罰明此等人皆可用如辛幼
安亦是一帥才但當明賞罰以用之耳

朱子語類

近世如汪端明專理會民如辛幼安却是專理會兵不
管民他這理會兵時下便要驅以塞海其勢可畏

同上

辛幼安為閩憲問政答曰臨民以寬待士以禮馭士以

嚴

同上

陳亮與辛幼安殿撰書亮頑頓浸已老矣面目稜層氣
象彫落但時見故舊則能大笑而已其為無足賴曉然
甚明獨念世道日以艱難識此香氣者不但人摧敗之
天亦僵仆之殆盡四海所係望者東序惟元晦西序惟
公與子師耳又覺戛戛然若不相入甚思無箇伯恭
中間擱就也天地陰陽之運闔闢往來之機患人無
眼睛硬肩胛頭耳長江大河一瀉千里不足多怪

文集

辛幼安畫像贊眼光有稜足以照映一世之豪背胛有負足以荷載四國之重出其豪末翻然震動不知鬚髯之既斑底幾膽力之無恐呼而來麾而去無所逃天地之間撓弗濁澄弗清豈自為將相之種故曰正鼠枉用正虎可以不用而用也者所以為天寵也

同上

程瑛丙子輪對劄子甲子之夏辛棄疾嘗為臣言中國之兵不戰自潰者蓋自李顯忠符離之役始百年以來父以詔子子以授孫雖盡僇之不為衰止唯當以禁旅列屯江上以壯國威至若渡淮迎敵左右應援則非公邊土丁斷不可用目今鎮江所造紅衲萬領且欲先招

萬人正為是也。蓋汾邊之人，幼則走馬臂弓，長則騎河為盜，其視虜人素所狎易。若夫通泰正揚舒，漸濡須之人，則手便犁鉏，膽驚鉦鼓，與吳人一耳。其可例以為邊丁哉？招之得其地矣，又當各分其屯。無雜官軍，蓋一與之雜，則日漸月染，盡成棄甲之人。不幸有警，則彼此相持，莫肯先進。一有微功，則彼此交奪，反戈自戕，豈暇向敵哉？雖然，既知屯之不可不分矣，又當知軍勢之不可不壯也。淮之東西分為二屯，必得二萬人，乃能成軍。淮東則於山陽，淮西則於安豐，擇依山或阻水之地而為之屯，令其老幼悉歸其中，使無反顧之慮。然後新其將。

帥嚴其教閱使勢合而氣震固將有不戰而自屈者又與臣言謀者師之耳目也兵之勝負與夫國之安危悉繫焉而比年有司以銀數兩布數匹給之而欲使之捐軀深入刺取虜之動息豈理也哉於是出方尺之錦以示臣其上皆虜人兵騎之數屯戍之地與夫將帥之姓名且指其錦而言曰此已廢數千緡矣又言棄疾之遣謀也必鉤之以旁證使不得而欺如已至幽燕矣又令至中山至濟南中山之為州也或背水或負山官寺帑廩位置之方左右之所歸當悉數之其往濟南也亦然又曰北方之地皆棄疾少年所經行者彼皆不得而欺

也又指其錦而言曰虜之士馬尚若是其可易乎蓋方是時朝廷有其意而未有其事也明年乙丑棄疾免歸又明年丙寅始出師一出塗地不可收拾百年教養之兵一日而潰百年葺治之器一日而散百年公私之蓋藏一日而空百年中原之人心一日而失鄧友龍敗朝廷以邱崇代之臣從邱崇至於淮甸目擊橫潰為之推尋其由無一而非棄疾預言於二年之先者

沁水集

陳傅良送辛卿幼安帥閩詩長才自昔恨平時三入修門兩鬢絲爰下可能長夜飲花間却學晚唐詞潛然北顧開河永簡在西清日月進乘雁雙鳬滄海上與君從

此恐差池

止齋文集

蔡元工於詞靖康中陷北庭辛稼軒以詩詞謁見蔡曰
子之詩則未也他日當以詞名家稼軒晚年專以長短句
名累五百首有奇

見舊志

李濂序曰辛稼軒平生與朱晦菴陳同甫洪景盧劉改
之輩友善劉改之氣雄一世其寄辛詞有曰古豈無人
可以似我稼軒者誰後百餘年卽鄆張野過辛墓有詞
曰嶺頭一片青山可能埋得凌雲氣又曰謾人間留得
陽春白雪千載下無人繼同時之所推獎異代之所追
慕稼軒之槩可知已

同上

金

劉勳客居濟南詩往往為人所傳嘗有詩云萬里風沙
憐病客幾年刁斗厭寒更人憐直道違時好自喜閒身
與世疎擊筑漫流燕客淚佩蘭誰識楚臣心濟南云午
風襟袖知秋早甲夜闌干得月多又云船行著色屏風
裏人在回文錦字中百和香薰風過處萬盤珠落雨來
時此類甚多少宣長於尺牘落筆皆有可觀其樂府如
莫鶚庭院春陰淡之句尤可喜也

中州集

元

濟南行記至濟南又留二日汎大明待杜子不至明日

行齊河道中小雨後泰山峯嶺歷歷可數兩旁小山間
見層出雲烟出沒顧揖不暇恨無佳句為摹寫之耳前
後所得詩凡十五首并諸公唱酬附於左

遺山集

按遺山汎明湖諸詩已見各門今檢其集凡涉濟
南詩俱附於此濟南雜詩十首云兒時曾過濟南
城暗算存亡只自驚四十二年彈指過却疑行處
是前生匡山聞有讀書堂行過山前笑一場可惜
世間無李白今人多少賀知章華山正是碧芙蓉
湖水湖光玉不如六月行人汗如雨西城橋下見
遊魚吳兒洲渚似神仙卷盡溪光碧玉泉別有洞

天君不見鵲山寒食泰和年石刻燒殘讌集辭雄
樓傑觀想當時只應畫戟清香地多欠韋郎五字
詩斫來官樹午陰輕湖畔遊人怕晚晴一夜靈泉
菴上宿四山風露覺秋生白烟銷盡凍雲凝山月
飛來夜氣澄且向波間看玉增不須橋畔覓金繩
入秋雲物便淒迷一道湖光樹影齊詩在嵒山烟
雨裏王家圖上舊曾題荷葉荷花爛漫秋鷺鷥飛
近釣魚舟北城佳處經行遍留著南山更一遊看
山看水自繇身著處題詩發興新日日扁舟藕花
裏有心長作濟南人又題解飛卿山水卷詩云平

生魚鳥最相親夢寐烟霞卜四隣羨殺濟南山水
好幾時正作卷中人又別李周卿詩三首云行路
澁於棘單車望千山歌君歸雲曲清涕留餘潸六
年河朔州動輒得謗訕惟君篤高義日來款紫關
古交松栢心今交桃李顏古人去不返古道挽不
還相思一樽酒幽恨寄山間風雅久不作日覺元
氣死詩中柱天手功自斷鰲始古詩十九首建安
六七子中間陶與謝下逮韋柳止詩人玉為骨往
往墜塵滓衣冠語俳優正可作婢使望君清廟瑟
一洗箏笛耳城居日蛙黽局促復局促去作山中

客放浪誰檢束溪光淡於冰山骨淨如玉懷我同心人團茅住深竹垂綸鮮可食種秫酒亦足石壇三萬丈醉眼天一粟安得萬里風相從兩黃鵠

周卿

學有淵源東州詩人未見其比與予約西遊如詩中所說

陳深濟南趙君成南使羈留三紀得還其猶子錄其遺事求詩為賦一絕三十六回秋月明年望斷雁南征

蘇郎皓首還鄉去魏殺當時李少卿

四朝詩選

國初張公可與李公仲方鮮于伯機同仕於朝既而張除浙省郎中李除都事鮮于除浙東宣慰經歷胥會於杭驩甚李卒於官張移書鮮于曰仲方歿矣家貧子幼

吾輩若不為之經紀則孤寡何所依也吾以一女許配其仲子矣公以為何如鮮于聞訃哀祭成禮亦以一女許贅其長子即從善也後官至紹興推官仲子字復初官至淮安總管於此可見前輩結交重義氣不以貴賤貧富易其心誠可敬也張公官至中書左丞

南村輯耕錄

齊人曹元野云濟南李昌道作李千戶先塋碑其間不書李千戶之妻某氏只寫子幾人其妻怒元野添上說知昌道公言不可書為婦人未終如何敢言婦人此是前輩所傳如此

金石例

趙子昂同知濟南唯趵突泉詩最著餘數篇人罕述之

如初到濟南云自笑平生少宦情龍鍾四十二專城青山歷歷空懷古流水泠泠盡著名官府簿書何日了田園歸計有時成道逢黃髮驚相問只恐斯人是伏生勝概樓云云

見古蹟

懷宋齊彥學士田師孟省郎云乍可望

塵迎使者何堪據案策疲民濟南雖有如漚酒準議愁

中過一春東城云野店桃花紅粉姿陌頭楊柳綠烟絲

不因送客東城去過却春光總不知湖上莫歸云云

見山

春日漫興云春事匆匆轉眼過滿城流水綠陰多西

園總有紅千葉塵土埋頭奈爾何又送山東廉訪照磨

于思容云林梢春動紫烟生策馬東風十里程若到濟

南行樂苑城西泉上最開情

看祖筆記

貢師泰送張介臣伴讀歸省濟南詩雲天迷濛日脚消
雪花散亂風飄蕭重裘著體如壓鐵呼酒不來寒正驕
東風匹馬去千里仰視玉屋當雲霄到家方健丹心苦
入門更聽兒女號華燈夜照舞衣熱男婦鳴和笙簫
暗黃著柳垂長條虎闌春信趣還饒一杯蓮子城南橋

四朝詩選

虞集題張希孟凝雲石詩海石不盈握隨然如委雲危
岑集琢思虛寶樓微熏天高太華斷日出香爐分几研
襲清潤文章互綢繆潛雷起神谷震驚天上聞亟視恐

無及化為九龍文

同上

人海記崇文門東南有淨度寺按元張中丞養浩作其
子雁奴墳銘有云權厝文明門外淨度寺之南原寺蓋

元時有之矣

見宋韓尊
日下舊聞

明

尹恭簡公旻掌銓十八年以知人名濟上至今尊恭之
嘗聞歷城周中丞繼述其家世云恭簡父名某世居濟
之竹店平生好施予濟人之厄嘗有賈人過其村憩道
旁井上遺金一囊而去尹翁見而埋之賈人者為章邱
巨室行錢舊嘗不售而歸巨室信此賈不以為罪獲罪

之若干再賈賈人感其義獲利數倍誓盡歸主人不分一緡以是為報及至井上而失去一日覺之忘其故處又往謁主人主人曰此亦數也已而復畀金若干再賈賈人再過井上恍若有憶徘徊久之尹翁訝而問之賈以狀告翁因叩其金多少與囊襍之狀皆與舊合即謂賈曰若無憂而金在也強井旁尺許得之封識宛然賈頓首謝去持井旁失金與主所更畀者入海為市舟中猝遇盜賈即出其金獻之盜亦感其忼慨謝曰吾無意攫子金也然我嘗刼麻一船無所用之以予子可獲大利而易子之金可乎賈隨載麻而歸輦巨室之門具以

人地異... 轉事 二
實告主人發而視之則皆金也蓋海賈畏盜藏其金麻
中而盜不知以予賈耳遂與主人中分之利且十倍此
一事有數益焉尹翁不匿金賈不欺主人主人不以失
利棄賈賈又善遇盜盜又不欺賈人賈與主人皆獲大
利而尹翁以昌其後陰隲之巧者也

成化間歷城尹恭簡公旻為小人所擠尹直著瑣綴錄
尤極誹謗其書久行於世至有不辨二尹邪正者一日
閱李文鳳月山叢談公道較然因錄於左方李云成化
末小人用事南昌李孜省挾左道干進位尚書掌通政
司託言神降有江西人赤心報國之語以太宰歷城尹

公不右江西人乃計謀極力擠罷而用豐城李裕代之
及薦泰和尹直入內閣起永新劉敷長憲臺高安黃景
貳禮部四人皆世稱寡廉鮮恥者而新建謝一夔安成
劉宣俱不保晚節一夔進工部尚書宣貳吏部物議沸
然不平獨服盱江何公喬新節行介特未幾攷省誅死
直等相繼免公論始明云當時謠曰公道不如王恕選
法不如尹旻

池北
偶談

昔子師司訓王晉明與釋至昂為方外交予時垂髫至
昂顧問師曰此秀才當有前程師叩之乃曰近者日食
救護見其始終長跪拱手正身無少俯仰則其端謹可

見師首肯之子亦莫信後登第入仕始信其言有徵

重修太平寺碑

劉天民贈王元氣詩并序殿直王元氣本歷下人遨遊江淮三十餘年聞予生同里閑來訪於壽揮酒瀕洞亦奇士也因有所贈花鳥方憐異域春風塵忽遇故鄉人虛稱劉表專南國試認王維出後身豪士篇章看爾俊諸侯館穀笑吾貧合當共發歸興樂水筐山兩道巾

函山集

客燕雜記嘉靖間李攀龍王世貞徐中行輩俱官西曹相聚論詩建白雲樓於四川司中榜諸君詩李詩盤句

云諸山城上出落日署中寒時人目刑部為外翰林日
下舊聞

于鱗為按察副使視陝西學而鄉人殷者來巡撫殷以
刻覈名尤傲而無禮嘗下檄于鱗代撰墓章及送行序
于鱗不樂移病乞歸殷固留之入謝乃請曰臺下但以
一介來命不則尺疏見屬無不應者似不必檄也殷愕
然起謝過有所屬撰以名刺往而久之復移檄于鱗志
曰彼豈以我重去官耶即上疏乞休不待報竟歸吏部
惜之用何景明例許養疾疾愈起用蓋異數也于鱗歸
杜門自兩臺監司以下請見不得去亦無所報謝以是

得簡佑聲又嘗為詩有云意氣還從我輩生功名且付
兒曹立諸公聞之有欲甘心者矣

藝苑
施言

于鱗一日酒間顧余而笑曰世固無無偶者有仲尼則
必有左邱明余不答第目攝之遽曰吾悞矣有仲尼則
必有老聃耳其自任誕如此

同上

李攀龍初蒞浙時長興徐中行餉以芥茶及再晤詢其
佳否攀龍曰已賞隸人矣中行為詳數其佳味及烹煎
法乃悔曰昔司馬旦以不諧吳俗而罷吳其有俗予安
可不諧而違之哉於是體輿情訪耆舊從俗酌宜以決
諸事而吳俗大諧咸稱才吏陞河南按察使

舊浙江
通志

李滄溟同殷許諸名士食塹墩一士在旁朶頤滄溟曰
君亦復能食此不補志

弁州卮言載滄溟在開中過許中丞宗魯伯誠許問今
天下名能詩何人滄溟曰唯王元美次則宗臣子相許
請子相詩觀之滄溟勃然曰夜來火燒却許面赤而已
余嚙之夫子相詩未必能過伯誠即索觀亦屬恒事
何至怫然如此又蔡子木入覲酒間自歌其夔州諸作
吳明卿輒斲聲與歌聲相低昂歌罷斲亦止今觀明卿
詩品亦未能過子木也文士護前往夜郎王自大適
足為識者軒渠耳厥後蔡巡撫中州吳謫歸德府推官

與徐子與張肖甫皆為名宦蔡身為行酒曰吾安敢有
其一以倣三君子哉子本固盛德不知爾時明卿當復
置身何地特著二事以為文士相輕之戒云香祖筆記
李滄溟食饅頭欲有意味而不見蔥唯蔡姬者所造乃
食其法先用蔥不切入餡而留饅頭上一竅候其熟即
拔去蔥而以麵塞其竅此謝在杭文海披沙所載即所
謂蔡姬典盡舊羅裙者也同上

李于鱗嘉靖間官按察使其詩多風塵字樣人謂之李
風塵其終也以舉筆作文心痛即死何大復亦然蔣一葵堯

山堂

外紀

殷公士儋少從里師郭公寧受書而李公攀龍為諸生
與郭善一日至郭舍見殷熟視偉之曰此少年生異日
當為大器吾不及也即引殷公下坐與揖讓居無何遂
舉省試名第相次為忘年交後殷謝政歸郭為郡丞亦
罷殷公每過其門必入謁師却行避席如少年禮郭公
亦安之弗改容也里人兩高之

見穀城山
館文集

殷士儋書葉母還金傳後語云利令智昏言哲人猶難
之也予觀葉母何其識之遠乎世所稱丈夫名能辨道
義卒遇貨利不恥沒於非分此其賢不肖不可同日論
矣夫葉子以才顯直禁密獲表揚其親不失令名亦可

謂善承其志也方葉母得遺不居有所酬弗內豈嘗有
意天之報施哉積仁潔行其子卒享之命以義也夫

舊志

郡中有四靈石瓊瓏清古極天工之巧一在府學一在

布政司一在孟宅一在劉家亭蓋傳自勝國者

齊音

秋雨初霽競秀爭流與劉公嚴亮采登北極臺瞻眺余

不禁叫絕幾欲乘風八極謂公嚴曰爾盡跨軼古人久

秘底稿祇以錄本示人吾今乘高縱目乃盡得翻閱正

譜獨恨難袖取耳

同上

近日好古文辭者有于茂才維直是太僕鯨子生來不

名一錢讀書魚池泉亭寒暑不輟周茂才之士美鬚髯

自號美髯能詩善作字已卯皆死於兵

花志

南中一君子問余曰歷下孰為好學余曰其張孟育乎
客曰何余曰人多求田問舍張獨積書插架一難也人
多充棟塵封張獨歲較數百卷二難也人胸無片墨輒
肆雄譚張獨深藏若虛三難也客曰雖未見張君公言
亦復佳矣

孟育嘗贈余詩曰一夜西風到井梧碧天蕭瑟岱雲孤
知君此際饒秋思譜得新聲幾曲無

胡昭來名顯宗性聰穎讀書過目輒記叙述今古事雖
數萬言皆有層折開應令聽者娓娓忘倦近歲酷好樂

府其念奴嬌云月涼風動枕衾寒惹起離愁欲絕玉韻
花情何處去空憶繞梁歌雪含淚自憐低聲相問猶記
叮嚀切是誰催促頓教千里長別但恨薄倖忘恩如何
便去也不和人說剩把重門深閉却不怕王孫慘咽願
得鱗音傳伊住處慰我腸千結免勞魂夢天涯夜夜游
徹聲情態韻宛然詩餘遺響假之以年何渠不駕車軼
李今則空憶繞梁歌雪耳

王大儒字汝為弱冠能詩酷嗜鍾譚詩歸為詩鮮雋不
類時吻學未大成賁志以死死攜友人岳鍾秀所錄詩
歸以殉嘗有贈友人尹若曾詩云秃筆撞硯硯為缺宛

墨落紙紙為裂丈夫哭則類婦人笑不敢笑說不說君
以奇禍得奇隍吞聲百里腸縷結可恨悠悠成遠別雁
行從此忽中折無情之憐妬不如搔首問天嘗面熱我
有敗鞘裹寒鐵其鳴蕭蕭刃比雪持以遙贈聊與訣物
不大滯不大泄縱爾家破猶存舌俛首事人終不屑熱
心欲降誰肯降出門一笑寒山劈竟其所之居然長吉
流也

王秋娘墓在佛山下碑鐫王小姐者是也大儒詩云斷
腸碑上小名香風雨經年損珮璫鏡瘦迥非新月樣花
殘猶憶舊時粧家家載酒逢寒食歲歲招魂總故鄉紅

袖揀人尋女伴誰憐孤塚葬鴛鴦余愛其慘而媚
碧虛仙人石尹恭簡家藏今歸趙司農家

以上俱舊志

國朝

歷城葉奕繩嘗為懷麗明言強記之法云某性甚鈍每
讀一書遇意所喜好即劄錄之錄訖乃朗誦十餘遍粘
之壁間每日必十餘段少亦六七段掩卷閒步即就壁
間觀所粘錄日三五次以為常務期精熟一字不遺粘
壁既滿乃取第一日所粘者收笥中俟再讀有所錄補
粘其處隨收隨補歲無曠日一年之內約得三千段數
年之後腹笥漸富每見務為汎覽者略得影響而止稍

經時日便成枵腹不如子之約取而實得也葉有文采
善劇由濟南人士推為淹洽其所言正困學要訣子讀
書苦不能記當時雖聞此法而不能用年既暮迴憶
舊所披覽已無隻字下筆窘索徒有悵悵見少年有志
者輒述此語之不惟自悔亦冀此法不没人間也高菴
閒話
顧炎武濟南詩落日天邊見二峯平臨湖上出芙蓉西
來水竇緣王屋南去山根接岱宗積氣蒼茫含斗宿餘
波澆潏吐魚龍還思北海亭中客勝會良時不可逢林亭

詩集

濟南詩凡三首非一年之作又有赴東

詩六首序云萊人姜元衡訐告其主黃培詩獄株連二三十人又以吳郡陳濟生忠節錄二帙首官指為余所輯書中有名者三百餘人余在燕京聞之亟馳投到頗繫半年竟得開釋因有此作又有贈李子德詩三十韻題云子德李子聞余在難特走燕中告急諸友人復馳至濟南省視於其行也作詩贈之蓋先生有田宅在章邱而濟南詩有云湖上荷花歲歲新客中時序自傷神則寓歷下亦久至繫獄之作距初作濟南二詩時又十二年矣其詩不能備錄因考先生遊踪而識之如此

高珩過水村訪懷高士詩清溪百折柳陰斜來訪城西

處士家和靖比來翻舊本梅花不種種荷花見懷氏雙觀行贊

王六士祿與諸賢集大明湖上同賦丹鳳城南秋夜長

王詩先成諸人皆閣筆推為絕唱詩云丹鳳城南秋夜

長關河寒近落微霜那須錦字論長恨自有清砧敲斷

腸破衲沙頭鴻欲去拂雲堆上草初黃傷心不及邊城

月猶照盧家玳瑁梁

汪琬說鈴

王士正順治乙未初春濟南作山郡逢春又作晴陂塘

分出幾泉清郭邊萬戶皆臨水雪後千峯半入城錢謙益集

吾鄉風雅盛於明宏正嘉隆之世前有邊尚書華泉後

有李觀察滄溟滄溟集盛傳於世華泉集一刻於胡中
丞可泉再刻於魏推官允孚又逸藁六卷刻於王方伯
桃溪又有李中麓太常選本山西臺察趙俟齋刻於太
原予所及見者前三本而中麓選本獨未之見諸本亦
漸就漸減矣康熙己卯予乃選刻於京師凡四卷子兒
啟涑以予私淑先生之切也移書宗姪革訪其後裔久
之革乃詳其家世報涑曰先生二子長子翼以廕官光
祿寺丞其後無聞次子習歷城諸生字仲學號南洲有
詩名習子治禮治禮子節節子庶皆以諸生奉祀事庶
子材材子紹祖伯先生至紹祖凡七世其家尚有先生

畫像云先生祀郡邑鄉賢其奉祀至材始失之材今年
老為人佃田紹祖始十餘歲亦失學傭工辛巳余假歸
凍乃為予述之而濟南諸生某某以書導材攜紹祖及
先生畫像謁予里第比予過郡因與巡撫王中丞東侯
提學徐僉事章仲備言先生名德而後裔僅有存者遂
以紹祖奉先生祀焉先生墓在萊莊亦革云

香祖
筆記

予既選刻邊尚書華泉集及其仲子習逸詩又訪其七
世裔孫紹祖請於當事為公奉祀歷城諸生張澆字澄
源邊氏子佃主也又訪其集於臨邑故家得魏允孚刻
本為重鐫之書來請序并謀新公祠宇置祭田可謂好

事喻義者因書之乙酉七月二十一日記

同上

濟南蔣稼妻毛氏不育而妒如勸之不聽年近四旬頗以嗣續為憂欲繼夫兄子弟與兄言兄諾毛與如言亦諾然故悠忽之兒每至稼所夫妻曲意撫兒餌以甘脆而問之曰肯來否兒亦應之兄私囑兒曰倘再問答以不肯如問何故答云待汝死後田產自為我有一日稼遽出行賈兒至其家毛又問兒果對如父教毛大怒逐兒曰妻孥在家固日日算我田產耶其計左矣不待夫歸立招媒媼為買妻時有賣媼者直甚昂勢將不就兄恐其遲焉而悔竊以金付媒媼偽為媼所轉貸者毛大

喜遂買之稼歸毛以情告稼亦怒與兄絕年餘妾生子
夫妻共喜毛曰媼不知假貨何人竟不置問此德不可
忘也稼乃囊金詣媼媼因以實告稼始悟歸與妻言相
為感泣遂治具邀兄嫂至夫婦皆膝行出金償焉兄不
受盡歡而散後稼生三子

蒲松齡聊齋誌異

李濬字紹溟歷城諸生滄溟六世孫案滄溟墓志有子
曰駒曰馴駒有三子弇州作傳言駒博學能文章有父
風而其後無聞焉愚山所置奉祀者誰耶歷下任生宏
遠輯趵突泉志中載李駒一詩而不工濬詩較勝或即
愚山所置者李氏雖式微其祀未斬也

山左詩鈔

璧城縣志卷第四十九終

歷城縣志卷第五十

雜綴二

異聞

漢

武帝太初三年東巡海上考神仙之屬未有驗者方士

有言黃帝時為五城十二樓以候神人於執期命曰迎

年上許作之如方命曰明年上親禮祠上帝焉公玉帶

曰黃帝時雖封泰山然封后封臣武紀作封鉅應岐伯

令黃帝封東泰山禪一作廣曰山合符然後不死焉天

子既令設祠具至東泰山泰山卑小董份曰泰山不稱

其聲乃令祠官禮之而不封禪焉其後令帶奉祠候神

物夏遂還泰山修五年之禮如前而加以禪祠石閭史記

封禪書

北海王和平性好道術自以當仙濟南孫邕少事之從

至京師會和平病歿邕因葬之東陶有書百餘卷藥數

囊悉以送之後弟子夏榮言其尸解邕乃恨不取其寶

書仙藥焉後漢書

南燕

濟南郡張公城西北有鷺浦南燕世有漁人居水側常

聽鷺之聲衆中有鈴聲甚清亮候之見一鷺咽頸極長

羅得之頂上有銅鈴綴以銀鑠隱起元鼎元年字

西陽雜俎

元魏

濟南郡東北有鯁坑傳言魏景明中有人穿井得魚大如鏡其夜河水溢入此坑坑中居人皆為鯁魚焉

長白山西有夫人墓魏孝昭之世搜揚天下才俊清河崔羅什弱冠有令望被徵詣州夜經於此忽見朱門粉壁樓臺相望俄有一青衣出語什曰女郎須見崔郎什恍然下馬入兩重門內有一青衣通問引前什曰行李之中忽蒙厚命素既不叙無宜深入青衣曰女郎平陵劉府君之妻侍中吳質之女府君先行故欲相見什遂

前入就牀坐其女在戶東立與什叙溫涼室內二婢秉
燭呼一婢令以玉夾膝置什前什素有才藻頗善風詠
雖疑其非人亦愜心好也女曰比見崔郎息駕庭樹嘉
君吟嘯故欲一叙玉顏什遂問曰魏帝與尊公書稱尊
公為元城令然否女曰家君元城之日妾生之歲什乃
與論漢魏大事悉與魏史符合言多不能備載什曰貴
夫劉氏願告其名女曰狂夫劉孔才之第二子名瑤字
仲璋比有罪被攝仍去不返什乃下牀辭出女曰從此
十年當更相逢什遂以玳瑁簪留之女以指上玉環贈
什什上馬行數十步回顧乃見一大塚什屈壁下以為

不祥遂請僧為齋以環布施天統末什為王事所牽禁
河堤於垣塚遂於幕下話斯事於濟南奚叔布因下泣
曰今歲乃是十年可如何也作罷什在園中食杏唯云
報女郎信我即去食一杏未盡而卒什十二為郡功曹
為州里推重及死無不傷嘆

高齊

譙郡有功曹嶠天統中濟南來府君出除譙郡時功曹
清河崔公恕弱冠有令德於時春夏積旱送別者千餘
人至此嶠上衆渴甚思水升直萬錢矣來公有思水色
恕獨見一青鳥於嶠中乍飛乍止怪而就焉鳥起見一

石方五六寸以鞭撥之清泉湧出因盛以銀瓶瓶滿水立竭唯來公與恕供療而已議者以為盛德所感致焉時人異之故以為目

唐

秦叔寶所乘馬號怒雷駿常飲以酒每於月明中試能監越三領黑羶及胡公卒嘶鳴不食而死

史論在齊州時出獵至一縣界憩蘭若中覺桃香異常訪其僧僧不及隱言近有人施二桃因從經案下取出獻論大如飯椀時饑盡之核大如雞卵論因詰其所自僧笑向實謬言之此桃去此十餘里道路危險貧道偶

行脚見之覺異因掇數枚論曰今去騎從與和尚偕往
僧不得已導論北去荒榛中經五里許抵一水僧曰恐
中丞不能渡此論志決往乃依僧解衣戴之而浮登岸
又經西北涉二小水上山越澗數里至一處布泉怪石
非人境也有桃數百株幹掃地高二三尺其香破鼻論
與僧各食一蒂腹果然矣論解衣將盡力苞之僧曰此
域靈境不可多取貧道嘗聽長老說昔日有人亦嘗至
此懷五六枚迷不得出論亦疑僧非常取兩箇而返僧
切戒論不得言論至州使招僧僧已逝矣

以上俱百
陽雜俎

唐齊州有萬頃陂魚鼈水族無所不有咸亨中忽一僧

持鉢乞食村人長者施以蔬供食訖而去於時漁人網得一魚長六七尺緝鱗鏤甲錦質寶章特異常魚欲齋赴州餉遺至村而死遂共剖而分之於腹中得長者所施蔬食儼然并在村人遂於陂中設齋過度自是陂中無水族至今猶然絕

太平廣記

國子司業崔融作武后冊文因發疾而卒時人以為二百年來無此文

開元時有崔尚者著無鬼論詞甚有理既成將進之忽有道士詣門求見其論讀竟謂尚曰詞理甚工然天地之間若云無鬼此謬矣尚謂何以言之道士曰我即鬼

也豈可謂無君若進本當為鬼神所殺不如焚之因爾
不見竟失其本

開元中有李氏者早孤歸於舅氏年十二有狐欲媚之
累月後別一小狐至云有一法當得永免李氏再拜固
求狐乃令取東引桃枝以朱書板上作齊州縣鄉里胡
綽胡邈以符安大門及中門外釘之必當永無怪矣狐
遂不至

以上俱太平廣記

張曙崔昭緯中和初同舉相與詣日者問命時曙自恃
才名籍甚人皆目為將來狀元崔亦分居其下日者殊
不顧曙第目崔曰將來萬全高第曙有愠色日者曰郎

君亦及第然須待崔家郎君拜相當此時過堂既而曙

果以慘恤不終場昭緯其年首冠曙以篇什刺之云千

里江西

唐詩紀事作山

陪驥尾五更風小

唐詩紀事作水

失龍鱗昨夜

浣花溪上雨綠楊芳草為何人崔甚不平會夜飲崔以

巨觥飲張張推辭再三崔曰但喫却待我作宰相與郎

君取狀頭張拂衣而去後七年崔自內廷大拜張後於

裴贄下及第果於崔下過堂

王定保唐城言

齊州有一富家翁郡人呼曰劉十郎以鬻醋油為業自

云壯年時窮賤至極與妻傭春以自給忽一宵春未竟

其杵忽然有聲視之已中折矣夫婦相顧愁嘆久之方

寐凌旦既寤一新杵在臼旁不知自何而至夫婦前視
且驚且喜自是因穿地頗得隱伏之貨以碓杵為神鬼
所賜乃寶而藏之遂棄春業漸習商估數年之內其息
百倍家累千金夫婦神其杵即被以文繡置於匱匣中
四時致祭焉

太平廣記

宋

趙明誠幼時其父將為擇婦明誠晝寢夢誦一書覺來
惟憶三句云言與司合安上已脫芝芙草拔以告其父
其父為解曰汝待得能文詞婦也言與司合是詞字安
上已脫是女字芝芙草拔是之夫二字非謂汝為詞女

之夫乎後李翁以女妻之即易安也果有文章易安結
襦未久明誠即負笈遠遊易安殊不忍別覓錦帕書一
剪梅詞以送之詞曰紅藕香殘玉簟秋輕解羅裳獨上
蘭舟雲中誰寄錦書來雁字回時月滿樓花自飄零水
自流一種相思兩處閒愁此情無計可消除纔下眉頭
却上心頭

婦人
記

謝枋得辛稼軒先生祠記枋得先伯父嘗登公之門生
五歲聞公風烈而嘉焉年十六先人以稼軒奏議教之
曰乃西漢人物也讀其書知其人欣然有折節之想乃
今始獲升公之堂瞻公之像見公之曾孫多英傑不凡

固知天於忠義有報矣為信陵置其塚者慕其人也過
田橫墓而祭者感其德高能得士也謂武侯祠堂不可
忘思其有志定中原而終不遂也有疾聲大呼於祠堂
者如人鳴其不平自昏暮至三更不絕聲近吾寢室愈
悲一寺人驚以為神公有英雄之才忠義之心剛大之
氣所學皆聖賢之事朱文公所敬愛每以股肱王室經
綸之寄自負昔公遇仙以公正乃青兗也公以詞名天
下公初卜得離卦乃南方丙丁火以鎮南也後之誣公
者欺天亦甚哉二聖不歸八陵不祀中原子民不行王
化大誓不復大恥不雪平生志願百無一酬公有鬼神

豈能無抑鬱哉六十年來世無特立敢言之士為天下
明公論公之疾聲大呼於祠堂者其意有所托乎枋得
倘見君父當披肝瀝膽以雪公之冤復官職還恤典易
名錄後改正文傳立墓道碑此皆仁厚之朝所易行者
然後錄公言行於書史昭萬世以為忠臣義士有大節
者之勸此枋得敬公本心亦所以為天下明公論扶人
極也言至此門外聲寂然枋得之心必有契於公之心

也

見宋
文選

余家濟南歷城曾大父少師遭靖康之難一家十六人
皆奔竄四出大父獨逃空谷晝伏宵行一旦遇追騎在

後自度不可脫遂急竄古祠亟伏佑聖坐下傍無蔽障亦不過待盡而已須臾北軍大索雖胥井林莽棟梁間極其冥搜而一坐之下初不知有人焉及抵抗則一家不期而集不失一人豈非神所佑乎逮今吾家世事佑聖甚虔凡聖降日齋戒必謹蓋以答神庥詔子孫非世俗祈福田利益比也

齊東野語

劉豫墓濟南城西鵲山下墓中產蜎

齊乘

元

至元乙酉三月乙亥太史奏文昌星明文運將興時世祖行幸上京明日丙子皇孫降生於儒州是夜起巖亦

生其後皇孫踐祚是為仁宗始詔設科取士起巖遠為
第一人論者以為非偶然也

元史
本傳

明

成化間藩封治王宮其西北隅為居民毛二宅應規入
毛以死爭不受價竟自刻有司具奏王為惻然因缺宮
城一角示儉且旌過云至今每六月一日則舉巷聞鬼
哭不數日而牆必圯蓋毛以是日死也匹夫癡魂結冤
不散余特以詩偈度之

齊音

王雲芝先生以南祭酒家居一日入虞帝廟倚廊誦咒
忽西廡方井中水暴泛溢橫流街衢當道遣人探視閉

門不得入呼亦不應登塙視之見先生方誦咒不輟各
官畢集遣役踰垣涉水洞開廟門扶先生出先生嘆云
石龜已露頂矣今門一開又復下沉深可痛惜蓋先生
所得石函書中有云上卷在舜廟西廡井內石龜腹中
故先生乘暇依法取之也

詩雪齋別集

許殿卿瞻泰樓乃與于鱗倡和處後宅為胥吏所得命
僕崔立掃樓忽見朱衣人云爾何人敢居吾室遂大罵
其主已而暴死

福志

穆吏部名深少登科居官多宦績暗為中官所中一夕
削籍遂鬱鬱成病額內有一人騎驢時相往來

同上

萬歷甲戌濟南有蔣生者貧而質子錢三十金久之遂
鬻宅於子錢家其價二百有奇質錢者以百金當其息
第以百金子之已而蔣生錢盡大窘怨恨遂自經死死
數日鬻宅駟僧行西門道上忽叩頭呼服謝蔣生求免
可一里許而返閉門伏匿頃吏叩門甚亟里人皆聞其
聲而無所見駟僧度不能免謂其妻曰我死必為所攝
第毋收我我當放歸遂出開扉而死其日子錢家亦死
并死其妾良久妾甦語人曰為蔣生所訴見府君府君
曰駟僧當質對妾何為者亟縱之還夫及駟僧方按治
未決云已而駟僧見夢其妻曰收我我不歸矣兵部韓

君應元為予道狀

畢登

萬歷丙子山東鄉試濟南西郭有單叟者夢人告曰今科解元徐日升也明日見一士人徒行西來衣敝履穿彷徨市中叟試叩之云東昌人徐姓叩其名即日升也叟大驚異白君必解元但留茆舍一切飲食泊場屋之費吾皆任之他日富貴毋相忘耳徐驚喜不勝及榜發竟落第領解則長山徐日升海曙也後累官僉事

池北偶談

王晴江見賓與洪友鶴孟賓竹善孟既售王將繼於中野泣倦而寢夢一亡友云子功名不在孟下何自苦如此寤而察之所卧乃亡友某墓也因益自負遂登第至

中丞

舊志

萬歷戊午歲大旱李中丞長庚招郭羽士築壇禱雨立應時趵突泉涸羽士為鐵牌鎮之已復如初近有海州杜惟全頗能隱刀點金之術亦一異也

傅茂才名志尹少有文名崇正戊辰夢有張龍李虎引至冥府傅抗禮曰名士不跪會張李嘖嘖有言遂得甦明年是日又夢二人來再至冥府不覺自跪至獄獄卒索錢榜笞甚苦俄張李來解之得脫傅問曰我與二君無水米交何多方救我耶二人曰前世與汝同為商我兩人為賊所劫君分貲救我得還故里誓報君三世傅

因問來世事二人曰來世君年四十餘傳寤以告友人
張繼又三日驚呼曰張李來矣遂歿

布政司後有仰泰樓舊有鳥巢其上崇正壬申十二月
忽自移去人爭訝之踰數日遂火

張子宏祚蜚語及上臺顏中丞執而訊之辭連陳茂才
洪佑陳故名家子遭時落魄又木強不能辨乃擬陳大
辟張反得城旦一日候鞠中丞門城上忽降一蛇纏張
頸萬衆闐然中丞廉得其情乃坐張於法而釋陳生
徐中丞名從治巡撫山東後中砲死先是肥城人刁守
京夜夢冥府取造七省輪廻冊有黃黑二卷色黃造善

色黑造惡冊竣冥王命守京往萊請徐撫臺至萊投書
徐公即發牌往四川成都鄆都縣到任徐公未卒先有
此說已而果卒

德藩端王於白雲湖得一馬鹿形每宴會則列於筵前
負八寶盤崇正戊寅馬無故自斃

鐵牛在府庠大門內微露其脊掘之愈深埋之愈顯蓋
亦臨水之鎮也世俗相傳以為鐵牛山又以歷山頂為
歷山縣治後為煤山為三山不顯云

以上俱
舊志

趵突泉仙跡記濟南池館之勝有趵突泉者水湧若輪
浮泓數畝遊觀者萃焉崇正庚午秋一日道士晨起忽

有醉墨淋漓大字数行在吕公閣削壁間憑虛縱書高
出水池之上殆非人跡所及俄頃之間官民赴集徘徊
賞歎其詩曰大仙何處黃鶴舞來鶴橋通白雪樓勝地
自逢人作主好風飄桂我驚秋千層松菊山山月十里
芰荷葉葉丹蘓迹幾行雲海渺湧輪亭上望悠悠純陽
題墨蹟竒放又在空中相與諦觀良是仙跡遂趣香茗
羅拜而去既有知其事者乃諸生出閣後夜飲泉亭秋
涼有月醉後一人立於水中一人踏於臂上濡紙書之
道士先眠未之見耳天下異聞竒事得無多類是耶

孫廷

銓注
序集

國朝

施副使閏章官山東往拜李滄溟先生墓重為立碑夜夢一緋衣者造其室自稱身是李攀龍以君知我故來

報謝

鈴說

施愚山在濟南時為滄溟先生作墓碑文且為立後奉祀一夕夢三丈夫我冠朱衣來謁一白髯者南面坐蒼髯次之末坐者尤奇偉旦日拜墓下則三墓纍纍相次問其裔孫云先生祖父三世葬此始悟蒼白髯者先生之祖父也愚山還將往南山購石見墓道間有石仆地磨礱如新遂刻已文此事與研北雜志所載嵇侍中謝

趙子昂書額事正相類

池北偶談

濟南趵突泉地中湧出三尺許餘則方塘漫流清鑑毛髮康熙庚戌藩臬置酒邀提學楊宮保捷忽大雷雨龍首入戶泉涌起丈餘水大上諸公急呼騎水頃刻及馬腹踣墜而死者數人從來未有之異也

同上

康熙己巳春正月於濟南府西之乾石橋見歷城耆民劉子全者年八十五矣尚嬰鏢自云生母魏氏年百有三歲尚在一姑嫁郭氏年百有七歲一姑嫁夏氏年九十有八子全有五子十三孫家藥山下子孫有為諸生者羣歎異之

同上

濟南有帝舜祠在南門之內癸未春方作醮事火忽自殿上出頃刻焚熟殆盡踰數日諸當事有事於祠方就殿址禮拜階下舜井水忽溢高數尺須臾汎濫急覓輿馬而出竟不終禮而罷井水出祠北流入明湖至今尚然不知是何祥也

香祖筆記

朱徽陰巡撫粵東時往來商旅多冤死莫可究詰公籌思廢寢禱於城隍之神是夜齋宿恍惚中見一官僚搢笏而入問何官答云城隍劉某將何言曰鬚邊垂雪天際生雲水中漂木壁上安門既醒隱謎不解輾轉終宵忽悟曰垂雪者老也生雲者龍也水中木為船壁上門

為戶合之非老龍船戶耶蓋省之東北曰小嶺曰藍關
源自老龍津以達南海嶺外巨商每由此入粵公即遣
役密授機謀捉龍津駕舟者次第擒獲五十餘名皆不
械而服悉置之法

聊齋誌異

康熙間會城城隍相傳楊姓神最靈應每晚廟祝閉門
後即聞敲朴呼號之聲一日見夢邑宰謂業牘甚繁隸
役不足以供使令可撥八人供役宰醒異之翌日將邑
隸八人書名赴廟焚之八隸一時俱死其子孫至今尚
時至廟焚楮祭奠至康熙五十年八月中秋忽有河南數
十人賫畫像一軸云神姓趙諱景文禹州武庠生歿已

有年忽見夢於鄉人云已為山東省城威靈公故某等結社繪像賞至因懸像殿之東偏楊誕四月趙誕九月至今兼為供奉沙漠之間令人莫測也

鍾雪齋別集

康熙初歷城彭翁夜過城隅忽聞二鬼相語云明早呂仙入城矣彭因早起候於門見一人肩猪首入城彭長跪請教牽挽不起其人云爾能從我惟所之乎彭曰諾遂相從至巡撫署時門尚未啟而徑入無礙至內中丞方與眾扶乩請仙其人即跪乩作字既訖事乃相從至厨下其人忽跳入爐內以手招彭彭不敢入其人倏忽不見而彭之形不可隱矣中丞詢其所自彭乃備述始

未皆與此筆符合

同上

康熙間濟南東關草寺修築殿基地忽陷工人皆墜下
乃一巨穴有坊上顏位朝二字後有屋內設有大龕前
有几上列銅器五古色斑斕屋東壁累磚高數尺上懸
四鐵索甚巨棺已朽敗尸骨具焉傍一巨瓮內外綠苔
生遍餘無他物寺僧將五銅器及瓮移出瓮貯以水盛
暑不臭葬者不知何人至所云位朝者或以誌方向耳

同上

宋壁家海棠樹花忽變白色是時壁有母喪因共呼之
曰孝崇山長焦汝翰賦詩紀異和之者若干人

宋氏詩冊

戴氏膠萊分司戴鈞女也適仁和沈君世烜景華僑居歷下相夫以禮敬如賓生二子而寡歸養分司官宅嘗欲死旋自勉曰有孤在誰撫之又一年二子繼殤氏又欲死復自念曰家有翁在誰事之欲歸未得聞翁亦歿於里曰我可以死矣家人嚴伺之乘伺恣倦而繼七日殮面如生氏於例得旌僑寓者難於申請而鄉里或以客死無據格於有司故記之以俟觀風者採焉

拙堂續澤談